

Bosna i Hercegovina
Federacija Bosne i Hercegovine
Kanton Sarajevo
Općina Hadžići
OPĆINSKI NAČELNIK



Bosnia and Herzegovina
Federation of Bosnia and Herzegovina
Sarajevo Canton
Municipality of Hadžići
MUNICIPALITY MAYOR

Na osnovu člana 15. Zakona o principima lokalne samouprave, („Službene novine Federacije BiH“ broj 49/06 i 51/09), člana 38. i člana 118. Statuta Općine Hadžići („Službene novine Kantona Sarajevo“, broj: 15/09, 17/12, 10/13, 14/13-ispravka, 11/18 i 1/20) i Odluke o izvršavanju budžeta za tekuću godinu, Općinski načelnik donosi:

PRAVILNIK

o uslovima i postupku za odobravanje jednokratne novčane pomoći u snošenju troškova liječenja, kupovine lijekova i ortopedskih dodataka za demobilisane borce.

Član 1.

Ovim Pravilnikom utvrđuju se uslovi i postupak ostvarivanja prava jednokratne novčane pomoći u snošenju dijela troškova liječenja, kupovine lijekova i ortopedskih dodataka za demobilisane borce (u daljem tekstu:Pravilnik), sa područja Općine Hadžići. Prava na jednokratnu novčanu pomoć po ovom osnovu mogu ostvariti samo lica ili članovi njegove porodice, koja imaju prebivalište na području Općine Hadžići, najmanje jednu godinu dana prije podnošenja zahtjeva.

Prava iz stava 1. ovog člana ostvaruju se u skladu sa ovim Pravilnikom i planiranim i raspoloživim sredstvima u budžetu Općine Hadžići.

Član 2.

Demobilisanim borcima u stanju socijalne potrebe u smislu člana 1. Pravilnika, smatraju se pripadnici Armije BiH koji ostvaruju pravo na novčanu egzistencijalnu naknadu po federalnom ili kantonalnom zakonu, te koji se nađu u stanju da im je neophodna pomoć društvene zajednice, jer na osnovu vlastitih materijalnih mogućnosti ne mogu obezbijediti zaštitu ugroženog života ili zdravlja, ili druge posljedice koje se ne mogu otkloniti bez tuđe pomoći.

Član 3.

Pravo na jednokratnu novčanu pomoć, u skladu sa ovim Pravilnikom mogu ostvariti demobilisani borci u slučajevima kada je potrebno na principu solidarnosti pomoći u zaštiti života ili zdravlja demobilisanih boraca koji se nađu u stanju socijalne potrebe, a njihove materijalne i druge prilike ne mogu obezbijediti prevazilaženje trenutne situacije u kojoj su se zatekli.

Član 4.

Pravo na jednokratnu novčanu pomoć, u skladu sa ovim Pravilnikom, može se odobriti za pomoć u snošenju dijela troškova liječenja, kupovine lijekova i ortopedskih dodataka za demobilisane borce u maksimalnom iznosu do 500,00 KM.

Izuzetno, Odlukom Općinskog načelnika, može se odobriti iznos veći od 500,00 KM u slučaju izuzetno teške materijalne situacije ili teške bolesti koja zahtjeva veće finansijske izdatke za liječenje iste.

Član 5.

Pravo na jednokratnu novčanu pomoć u smislu člana 1. Pravilnika može se ostvariti samo jednom u toku kalendarske godine.

Član 6.

Dodjela jednokratne novčane pomoći u smislu odredaba ovog Pravilnika vrši se na osnovu pismenog zahtjeva lica u stanju socijalne potrebe, ili člana njegove uže porodice, uz koji je potrebno priložiti:

- a) Ovjerenu fotokopiju lične karte i CIPS,
- b) Medicinsku i drugu dokumentaciju o liječenju (nalaz, mišljenje i preporuke ljekara specijaliste) da nije starija od 6 mjeseci,
- c) Dokazi o troškovima- fiskalni računi (liječenja, plaćenih lijekova, kupovine ortopedskih pomagala i sl.) da nisu stariji od 6 mjeseci,
- d) Dokaz o primanjima (da je na evidenciji BIRO-a za zapošljavanje/ uvjerenje o primanjima/ ček od penzije),
- e) Kućna lista,
- f) Potvrda o otvorenom transakcijskom računu u banci.

Član 7.

Zahtjev iz prethodnog člana sa traženim novčanim iznosom, sa potrebnom dokumentacijom, podnosi se putem protokola Službi za boračko-invalidsku, socijalnu i zdravstvenu zaštitu, izbjegla i raseljena lica (u daljem tekstu: Služba), na propisanom obrascu koji je sastavni dio ovog Pravilnika.

Član 8.

Po zahtjevu za dodjelu jednokratne novčane pomoći u snošenju dijela troškova liječenja odlučuje Općinski načelnik zaključkom, na prijedlog Službe, a u skladu sa odredbama ovog Pravilnika.

Član 9.

Služba ima pravo i obavezu da po službenoj dužnosti, tamo gdje je potrebno i moguće, pribavi isprave i dokaze o činjenicama i okolnostima od značaja za odlučivanje o osnovanosti zahtjeva za odobrenje pomoći, prema uslovima predviđenim u ovom Pravilniku.

Član 10.

Služba razmatra prispjele zahtjeve i priložene isprave i dokaze, radi provjere ispunjenosti uslova iz člana 6. ovog Pravilnika.

Ako na osnovu utvrđenih činjenica, povodom podnesenog zahtjeva, služba utvrdi da nema osnova za odobravanje jednokratne novčane pomoći predlaže da se takav zahtjev odbije kao neosnovan.

Član 11.

Nakon razmatranja zahtjeva, Služba dostavlja izvještaj i prijedlog Općinskom načelniku, koji zaključkom odlučuje o odobravanju jednokratne novčane pomoći za ove namjene. Odluka donesena povodom zahtjeva za dodjelu jednokratne novčane pomoći je konačna i izvršna.

Služba je ovlaštena da u slučaju potrebe može vršiti sve vrste provjera priloženih dokaza na kojima lice zasniva osnovanost svoga zahtjeva.

Član 12.

U slučaju da zahtjev ne ispunjava uslove za dodjelu novčane pomoći, Služba pismeno obavještava podnosioca zahtjeva o odbijanju istog.

Zahtjevi koji ne sadrže potrebnu dokumentaciju iz člana 5. Ovog Pravilnika, neće se razmatrati i isti će biti odbačeni.

Član 13.

Visina dodjeljene novčane pomoći zavisi od težine i prirode bolesti, visine sredstava potrebnih za liječenje, hitnosti slučaja, kao i od visine raspoloživih sredstava u budžetu Općine Hadžići.

Član 14.

Isplatu odobrenih finansijskih sredstava za pomoć u liječenju, kupovini lijekova ili ortopedskih pomagala za demobilisane borce, na osnovu zaključka Općinskog načelnika vrši općinska Služba za privredu i finansije, putem žiroračuna podnosioca zahtjeva ili člana njegove uže porodice.

Član 15.

Ovaj Pravilnik stupa na snagu danom donošenja i bit će objavljen na oglasnoj ploči i web stranici Općine Hadžići, a primjenjivat će se od 01.01.2025.godine.

Broj: 02-11-3-2331/25

Hadžići, 20.02.2025. godine

